

儀  
顧  
堂  
續  
跋

儀顧堂續跋卷十四

歸安陸心源伯剛甫著

元槧郭茂倩樂府跋

樂府詩集一百卷題曰太原郭茂倩編次前有至正  
初元周慧孫序至元六年李孝先序元槧本每葉二  
十二行每行二十字卷首有彭城二字朱文橢圓印  
錢孫保一字求赤白文方印秀水盛柚堂朱文長印  
每冊有盛百二白文方印孫保朱文方印錢氏校本  
朱文方印天啟甲子朱文方印卷中朱筆皆求赤筆  
四庫提要云據建炎以來繫年要錄茂倩爲侍讀學

士郭褒之孫源中之子其仕履未詳愚案茂倩字德  
粲東平人通音律善篆隸元豐七年河南府法曹參  
軍祖勸翰林侍讀學士給事中贈吏部尚書父源明  
字潛亮初名元賡字永敬嘉祐二年進士官至職方  
員外郎知單州軍州事蘇頌誌其墓見蘇魏公集卷  
五十九與繫年要錄微有不同要錄從永樂大典錄  
出恐有傳寫之譌蘇集從宋本影寫當可據惟郭源  
中亦有其人累官都官員外郎充廣陸郡王申王院  
教授職方員外郎見蘇魏公集外制或源明與源中  
弟兄而茂倩嗣源中歟

宋槧宋朝文鑑跋

新雕宋朝文鑑一百五十卷目錄一卷題曰朝奉郎  
行秘書省著作佐郎兼國史院編修官兼權禮部郎  
官臣呂祖謙奉聖旨銓次前有呂喬年編文鑑始末  
呂祖謙進表謝表周必大序劉炳序後有沈有開跋  
趙彥适序每葉二十行每行十九字版心有字數及  
刊工姓名先是此書祇有建寧書坊刊本文字脫誤  
嘉泰甲子梁溪沈有開知徽州參校訂正刊于郡齋  
嘉定十五年辛巳趙彥适以東萊家本改補三萬餘  
字刊而新之端平元年四明劉炳守新安又于東萊

家塾得正誤續本命新安錄事劉崇卿參以他集刪改三千有奇見沈有開趙彥适劉炳序跋與嚴州刊小字本多所不同小字本當出建寧坊本此則以呂氏家塾彙訂正者也嚴州本前明版刊尙存藏書家多有之此本則前明正德中已罕流傳葉文莊菴竹堂藏書極富僅從顧觀海家本影抄見愛日精廬藏書志劉炳明州人寶慶二年進士見延祐四明志趙彥适魏王廷美九世孫見宋史宗室表喬年字巽伯東萊弟祖儉長子也沈端憲壻袁絜齋稱其克肖厥父議論勁正不阿見絜齋集沈有開字應先常州無

錫人先受業于張南軒杖呂成公仕嚴有開亦從之

淳熙五年進士累官處州教授太常博士秘書丞寧  
宗卽位與趙忠定之謀遷起居舍人爲忌者所中家  
居十年起知徽州奉使江東連疏求去知太平州加  
直龍圖閣致仕見咸淳毘陵志葉水心集以此本校  
嚴州本卷一五鳳樓賦屋卑者豐上脫臺卑者崇一  
句卷二十四范雍招魯清詩嚴州本有目無詩此本  
目在宋庠重展曰湖後詩附卷末嚴州本卷六十梁  
燾論呂大防乞以早罷疏末缺一百十餘字胡宗愈  
請令帶職人赴三館供職疏首缺八十餘字而以梁

肅諭呂疏皆思以禮句與胡宗愈疏職臣愚竊謂士不知朝廷之治體云云接連其梁燾論還政疏則全缺卷七十一陳瓘台州羈管謝表嚴州本自奉聖旨陳瓘自撰尊堯集云起此本多臣某言云云一百三十餘字卷六十九代范忠宣賀平河外三州表京東運副謝到任表皆畢仲游作嚴州本誤作林希嚴州本卷六十五有王冕漳州進珠表此本有目無文或重修時刪之歟

宋槧唐百家詩選殘本跋

唐百家詩選存卷一至卷五卷十一至十五前有王  
荆公序元符戊寅楊蟠序每葉十八行每行二十字  
版心有刻工姓名宋諱玄朗匡殷貞眞徵恒珣煦曙  
署樹竟鏡境敬榮警皆爲字不成卷六河流暗與溝  
池合之溝字卷十三慎莫厭清貧之慎皆不缺避而  
非南宋刊其爲元符刊無疑卷一日月雨雪雲五類  
卷二四時晨昏節序泉石四類卷三花木茶果蟲魚  
三類卷四京闕省禁屋室田園四類卷五樓隱歸休  
二類卷十一音樂書畫親族墳廟城驛雜詠六類卷



十二古京宮榭古室古方國昔人遺賞昔人居處五  
類卷十三十四送上送下卷十五別意有懷二類卽  
百宋一廬賦所謂小讀書堆分類本也分類出自後  
人則不可知選則未必僞選或非盡出荆公詩則不  
僞宋榮仲必以此本爲僞亦一偏之見耳書賈欲充  
完本自十一以後首行末行卷字下及版心數目字  
皆挖改幸有挖之未淨者原書卷第細審尙可辨每  
冊有休文後人朱文方印北山草堂洪灣沈氏白文  
兩方印北山草堂珍藏朱文橢圓印汲古主人朱文  
方印子晉朱文方印麟湖沈氏世家朱文長印

影宋天台集跋

天台前集三卷前編別編一卷續集三卷續集別編一卷影寫明刊本前集三卷續集前二卷皆李庚編後一卷林思葺林登李次蓐編前集別編續集別編題曰郡人林表民前集有嘉定元年李兼序別編後有陳耆卿跋又拾遺十二首有嘉定癸未林表民跋續集後有李兼題別編卷五後有淳祐戊申卷六後有淳祐庚戌林表民跋

提要云庚字子長其爵里無考惟李兼序有李榮出其先公御史所哀文集語又有寓公李公語則嘗官

御史而流寓天台者也愚案庚臨海人字子長厯御史臺主簿監察御史兵部郎中繼奉祠提舉江東常平乾道間知南劍州勤廉有爲常勸義冢分男女爲左右誌以兩塔淳熙中朝散大夫知撫州後知袁州未上卒有集號詒癡符藏書甚富買屋近郊聚書數萬卷于樓上閉戶不與人通老矣猶沈酣其中里閭罕識其面見樓鑰攻媿集江西通志福建通志嘉定赤城志卷三陳耆卿跋續集李兼跋皆言別編爲林表民之父師點所纂續集後一卷則爲州人林思茂林登及其子李次臺所編此本別編皆題表民名而

表民之跋絕不述及其父何也所採諸人如王欽若  
陳堯叟查道初暉丁謂馬知節李維劉鎬孫奭李建  
中陳越曹谷曾會姜巖蘇爲陳旣濟趙世長王從益  
戚綸張復錢易章得象黃震劉起孫冲崔希範王得  
益方演舒實賈收葉清臣高竦黃鑑吳遵路張友道  
章岷刁約吳育趙槩傅瑩張瓌許懋楊大雅余良孺  
孔陶皇甫泌徐舜俞張士遜呂夷簡魯宗道李簡李  
諮李及李遵助宋綬祖士衡張師德馮元邱雍石中  
立黃宗旦錢景臻李宗諤梁鼎陳克吳淑劉少逸安  
德裕孫旦葛閔張日損何執中陸長倩徐億劉握周

延儒趙企陳白張景修石公弼左知微石待舉吳賈  
方洵武黃璞王珏羅適余元李柬劉宗孟張奕劉理  
錢暄馬良器郭三益章懋鄭與京俞純父黃軫李經  
李熙輔吳可幾汪泌柳安道姚舜諧石象之楊審薛  
如初張無夢許操葉發岑象求虞策劉彝左譽虞謨  
孫大廉楊蟠李復圭姚孳郭茂倩余爽張康國周之  
深樓光石郊太史章元積中楊愈李仲偃畢士安陳  
堯佐蘇澥史蘊李元凱石端誠錢惟濟趙況石義叟  
阮思道舒雅張肅王化基林顥吳師正鄭至道王漢  
之王河之毛漸錢總王欽臣呂穆仲宋景年蔣之奇

元絳王介之姚祐馬城孟觀鮑朝賢劉丹慎鏞周啟  
明鮑當蘇庠孫何左緯趙岷李鎔成大亨郭明甫姚  
寬陳公甫陳恬任太初江爲蔡肇錢昱范貽孫趙挺  
之范鉞王廉清周升李邴王絢韓肖胃洪擬錢伯言  
黃叔敖李擢胡世將胡舜陟趙思誠胡邃江常曾統  
徐公裕謝升俊莊綽薛弼陳棠鄭望之侯彭老康執  
權范寅賓吳說鄧仁憲廉布劉季孫鮑慎由李長民  
林仰蔣璨賀允中劉棐鄭誼高述陳興宗薛抗范宗  
尹潘朝英沈揆曾惇李益謙謝伋王嶠郭仲荀張偁  
蔡向崔黃臣章望之王振徐融孟大武楊筠蘇遲蘇

簡何沆李益能

薛昂陳瓘錢文子彭郁徐大受

林憲高似孫胡融徐似道陳謨蕭振李龔王卿月晁  
公爲錢端禮汪澈岳甫虞似良張昌求仲弓王曉鄭  
伯熊高文虎陳知柔丁可石礪劉知過唐仲友楊傑  
李庚李兼李龜朋桑世昌謝直趙彥齡袁復一林師  
茂陳謙鄭伯英劉次皋宋之瑞黃醬徐桷王戢陳相  
安丙顧化龍王居安陳巖李琪陳夢建胡文修李端  
民王衡趙汝愚趙汝讜石延慶趙必愿劉坦之釋長  
吉道全法具慧明蘊常或集已無存或並名氏闕然  
皆賴此集存其崖略而楊億蔣堂晏殊夏竦張舜民

朱翌周行己許景衡胡宿蔡宗禮張守李正民洪邁  
曾幾尤袤汪藻諸人之詩往往爲武夷新集春卿遺  
稿晏元獻集胡文恭集夏文莊集畫墁集潛山集北  
海集浮沚集橫塘集毘陵集浮溪集野處類稿茶山  
集梁侯遺稿所未收可藉此以補其缺



聲畫集跋

聲畫八卷前有淳熙丁未十月谷橋孫紹遠稽仲  
自序提要云自署谷橋不知谷橋爲何地也愚案福  
建通志孫紹遠淳熙七年以承議郎知興化軍丁未  
爲淳熙十四年距知興化時不及十年當即其人金  
承遜制縣之下置鎮及得宋地地名多承宋舊惟於  
縣之下置鎮金史地理志南京路開封府祥符縣鎮  
四一曰郭橋谷郭同音谷橋當即郭橋紹遠雖南渡  
後人先世或爲谷橋望族不署縣名而署谷橋猶著  
鼠璞之戴植世居桃源鄉不署鄞而署桃源也

嚴陵集跋

嚴陵集九卷前紹興八年董芥序知不足齋抄本每卷有目連屬篇目遇國朝字皆提行乾隆中鮑以文從天一閣所藏宋本傳錄者案芥字令升宣和中官鎮江府學教授紹興初官廣西提刑以趙鼎薦四年擢吏部員外郎尋試太常少卿改尚書右司員外郎守起居舍人兼禮部侍郎有旨禁程頤禮部欲錄黃行下芥難之爲御史劾奏七年罷爲集英殿修撰知衢州旋請祠起爲徽猷閣待制知嚴州罷任寄居宜興二十六年起知婺州引年告老著有廣川家學

二十卷燕談三卷見書錄解題繫年要錄

宋槧中興羣公吟稿戊集跋

中興羣公吟稿戊集七卷宋刊本每葉十八行每行  
十八字卽石門顧修刊本所祖也凡戴石屏三卷高  
菊磻二卷姜白石一卷嚴祖叔一卷宋本有目錄十  
四葉顧本行款皆同獨缺其目前有戈小蓮跋黃堯  
圃手書二跋卷中有呂晚村家藏圖書朱文長印沈  
廷芳字春旃更字椒園白文方印馬思贊印白文方  
印仲韓朱文方印元錫之印白文方印嚴氏久能朱  
文方印芳椒堂印朱文方印案呂晚村名留良石門  
人國初以謀逆戮屍馬思贊字韓仲一字寒中又字

南樓海寧人其藏書之所曰衍齋嚴久能名元照歸  
安諸生其藏書之所曰芳椒堂與錢竹汀友善沈廷  
芳字晚叔一字荻林仁和人監生舉鴻博授編修官  
至山東按察使箸有十三經注疏正字隱拙齋集何  
元錫字夢華杭州人是書原本四十八卷一百五十  
三家見趙希弁讀書附志

四庫未收阮文達亦未進呈今祇存七卷四家目後  
有割補痕恐戊集亦不全耳

宋槧文章正宗跋

文章正宗二十四卷宋槧本每葉二十行每行二十字版心有字數及刊工姓名宋諱有缺有不缺蓋宋季坊刊也間有元修之頁則無字數及刊工姓名矣提要云總集之選錄左傳國語自是編始遂爲後來坊刊古文之例誠哉是言豈知變本加厲有以典謨訓誥與後世文人並選者乎是又西山所不料也

宋麻沙本萬寶詩山跋

選編新奇萬寶詩山三十八卷次行空三行題書林  
葉氏廣勤堂新槧前有雍作噩歲重九日余性初敘  
宋省監皆試五言六韻詩建陽書賈葉景達彙爲此  
書以備場屋之用凡分四百數十類約一萬六千餘  
首每葉三十行每行二十三字

四庫未收文達亦未進呈各家書目亦不著錄始見  
于明文淵閣書目延陵季氏宋版書目王氏孝慈堂  
書目爾疋太歲在戊日箸雍在西日作噩戊與酉不  
相值非戊戌卽己酉之譌蓋理宗淳祐末年刊本也

元槧唐詩鼓吹跋

唐詩鼓吹十卷題曰資善大夫中書右丞郝天挺註  
每葉二十行每行二十字小字雙行有音有註注卽  
埒于句下版心有字數及刻工姓名前有至大元季  
趙孟頫序至大戊申西蜀武乙昌序姚燧序後有大  
憲七年盧摯後序遺山選詩于唐祇取此九十餘家  
去取不得謂不嚴惟胡宿宋人宋史有傳誤在唐人  
之列想由南北隔絕未得其詳郝氏當元一統之嘗  
雖不強爲註釋而不加辨正何也明之廖文炳

國朝之錢朝龜王俊臣王清臣陸貽典增註此書自



謂正郝氏之失而亦絕不一及豈未見宋史耶天挺  
字繼先號新齋出于宋魯別族仕元世宗至仁宗官  
至河南行省平章諡文定見元史一百七十四及武  
乙呂姚燧序非金史隱逸傳之郝天挺

四庫提要已據池北偶談正陸貽典之謬陸所見本  
無武姚二序及盧摯後序

四庫所据本同均不若此本之完具也

元版中州啟劄跋

中州啟劄四卷元槧本每葉二十六行每行二十二  
字錢氏補元史藝文志箸于錄原本久佚乾隆中館  
臣從大典錄出二卷附存其目前有大德辛丑江西  
儒學提舉許善勝序是書爲元江西行省檢校掾史  
蒲陰吳宏中元卿編見許序所收爲趙閑閑許魯齋  
元遺山姚雪齋寶太師楊西菴王文炳杜止軒徐威  
卿楊飛卿商孟卿郝陵川王澹游陳季淵宰晉伯勾  
龍英儒胡德珪胡紫山徒單雲甫王器之陳之綱呂  
鵬翼王顯之烏古倫正卿高勝舉鮮于純叔王子勉

王子初王仲謨劉靜修姚牧菴劉伯宣徐子方許蒙  
泉盧疏齋張夢符宋齊彥王肯堂李澍張子良晉汝  
賢師顏安鎮海唐顯之四十四人之作皆布帛粟菽  
之辭四庫館未見全本此則猶元時原本也

影元抄玉山名勝集跋

玉山名勝集明天啟中徐韶翁刊于廣東張萱爲之校勘卽今

四庫箸錄九卷本也此本不分卷自玉山草堂起至寒翠止三十八題每題各爲起訖與常熟張月霄藏本同尙從元人舊本抄出與九卷本頗有不同如玉山草堂分題詩此本脫良琦顧瑛于立七首九卷本則缺鄭元祐得秋字陳基得新字二首玉山佳處九卷本有袁華七律一首爲此本所無今各依類補入九卷本柳塘春末附玉鸞謠玉鸞傳二篇亦爲此本

所無已刻于鮑渌飲所輯玉山逸稿今不錄然天啟  
本寒翠所上脫一葉綠波亭題詠中缺僧法堅陸仁  
釋至矣詩三首文質詩一首而割裂他詩羈入且謬  
誤甚多不如此本之善

元槧元文類跋

國朝文類七十卷目錄三卷前至正二年浙江儒學  
提舉司公文一道備載至元二年中書省咨待制謝  
端修修撰王文郁應奉黃清老編修呂思誠王沂楊  
俊民等請于江南學校錢糧內刊版呈省府委副提  
舉陳登仕校勘劄付至元四年西湖書院交到書板  
中文省府委西湖書院山長方員同儒士葉森對勘  
劄付至正元年提舉黃奉政關文次有元統二年江  
南行御史台監察御史南鄭王理敘國子助教陳旅  
序後有元統三年太原王守誠跋至元四年西湖書

院初刊第四十一卷缺下半卷一十八版九千三百餘字目錄及各卷有九十三板脫漏差誤一百九十餘字經黃奉政于蘇天爵家得元藁請補刊完全此本四十一卷既已補完其餘亦無一缺葉爛版當是至正二年初印本每葉二十行每行十九字版心有字數及刊工姓名目錄後有儒士葉森點對六字卷中有玉蘭堂印白文方印王履吉印白文方印健菴二字白文方印季振宜藏書朱文長印御史之章朱文大方印吾道在滄洲朱文方印玉蘭堂長洲文徵明藏書之所王履吉名寵文徵明弟子季振宜號滄

韋泰興人順治中官御史吾道在滄洲御史之章皆其印也元文類刊本余所見凡五一爲翠微精舍本刊于元至正初一爲明晉藩本題曰元文類刊于嘉靖時一爲明坊刊細字本題曰校元文類當刊于明初一爲修德堂本刻于明季一卽此本乃此書祖本也多考亭書院記翠岩本明初坊本又多卷十八李節婦馮靜君兩贊卷七十高昌侯氏家傳卷十九建陽江源復一堂記似皆書賈所妄增西湖書院之版明時尙存缺葉爛斷甚多晉藩本行款與西湖同而缺爛甚多當以後印西湖本翻雕者翠微本卷四十二



缺下半卷當據至元四年西湖未修補本付雕而增  
考亭書院記明初本又從翠岩本出而妄有所增修  
德本則又據坊刊細字本重雕者五本之中以西湖  
本爲最此則又西湖本之最善者也

元槧中州集跋

翰苑英華中州集十卷中州樂府一卷前有元好問  
中州鼓吹翰苑英華序首爲十一卷總目卷一首題  
中州集下十集仿此樂府則題中州樂府每卷有目  
連屬篇目樂府卷末有至大庚戌平水進修堂刊木  
記每葉三十行每行二十八字版心有字數皆宋本  
舊式也平水在平陽府見金史地理志元太宗八年用  
耶律楚材言立經籍所于平陽見元史進修堂當是  
書坊之名猶建安之有勤有堂萬卷堂耳宋元之際  
坊刻南有麻沙北有平水遙遙相對然麻沙刊本流

傳尙多平水刊本此外惟平水韵略蓋亦難能而可貴矣汲古毛氏刊本先缺樂府後得陸文裕家藏本始成全璧而十一卷總目終缺此猶元刊元印總目亦全提要以集中小傳皆兼評樂府爲樂府中州集合爲一編之証今總目第十卷後接樂府目又爲提要得一塙証矣

宋元詩會跋

宋元詩會一百卷題曰皖桐陳焯輯選焯仕履已詳提要前有康熙癸亥曹溶序曹溶與焯書潘江序凡例九條是書爲焯乞養罷官後所輯卷一至卷三十三北宋二百三十一人卷三十四至六十五南宋一百六十八人字里世次無考二十五人神童二人羽流釋子三十四人香奩二十九人六十六至卷一百金詩一百三十五人元詩二百七十五人凡例頗自負屢舉潘訥叔曹石倉詩選一人數收之失今觀其書疏謬更甚于潘曹誠有如

提要所譏者如致中徐璣字也徐璣與徐致中並收  
致中小傳曰清熙皆人與永嘉四靈唱和于夏日懷  
人詩注下曰此詩併謝公岩作別本又作徐璣是知  
有永嘉四靈而不知致中卽四靈之字王澹冉琇元  
吉孟鯁皆金人見中州集劉壎至大辛酉爲南劍州  
學官見隱居通議而皆列之南宋江爲魯交俞汝尙  
黃大受利登薛嵎黃文雷杜旃名氏尙顯而列之字  
里世次無考仁宗賜梅摯詩全篇載庚溪詩話而以  
爲不傳孝宗冷泉亭詩全篇載武林舊事而僅收十  
四句皆疏漏之甚者司馬朴以不屈被殺字文虛中

以劫金主被殺朱弁滕茂實被羈不屈宋史皆有傳  
何宏中爲韋城尉汴京被圍獨韋城不下後爲兩路  
統制接應副使以糧盡被禽金人憐其忠授之以官  
宏中投牒于地曰我嘗以此物誘人出死力若輩欲  
以此嚇我耶囚京西獄久之免爲黃冠自號道理先  
生起紫微殿遷徽宗東華君御容事之後病歿姚孝  
錫爲代州兵曹金人寇雁門州將議降孝錫投牀大  
斲不與其議旣得脫去遂往五台移疾不仕放浪詩  
酒自號醉軒皆見齋東野語此六公者皆宋之忠臣  
而列之金人焯自謂辨正宋史有功史學而顛倒黑

白一至此乎

至正鄱陽本金石例跋

蒼崖先生金石例十卷次行題鄱陽楊本編輯校正  
三行題廬陵王思明重校正每葉二十行每行二十  
字小字雙行前有至正五年楊本序傳貴全序湯植  
翁序王思明序後有潘詡跋序跋每葉十二行行十  
三字卷十後有諸生趙光邈謹書學生洪慶重錄二  
行昂霄箸此書生前未經定藁至正五年其子詡字  
敏中者爲饒州理官屬鄱陽楊本字緝如者校正而  
次第之丁亥刻于中州至正九年戊子王思明復刊  
于鄱陽此則王刊本也有太原叔子藏書蓮涇二印



元第三刊金石例跋

蒼崖先生金石例十卷目錄次行題鄱陽楊本校正  
三行廬陵王思明重校正前有楊本序後有潘詒跋  
每葉十行每行二十二字序跋行款與全書同卷九  
後有十卷多論先王本朝制度故茲未暇錄焉一行  
四庫提要云書在元代版凡三刊至正五年詔刊于  
家者爲初刊至正九年戊子王思明刻于鄱陽爲再  
刊此本刊自何人無攷當又在戊子鄱陽刊本之後  
前雖缺湯傳王三序目錄有思明校正一行可証蓋  
是書元代第三刊也有西畝艸堂白文方印

許彥周詩話跋

許彥周詩話宋刊本每葉二十六行每行二十八字  
前有建炎戊申自序提要頌襄邑人彥周其字也始  
末無考愚案石門文字禪有大雪寄許彥周宣教法  
弟臥病次彥周謝彥周仙茅彥周見和復答次韻彥  
周送彥周贈彥周遊南嶽參機道者次韵彥周見寄  
彥周借書彥周法弟作出家菴又自爲銘作此寄之  
其送彥周詩有云彥周雖綠髮風味映前古又云死  
生人所怖玩之于掌股語一則曰法弟再則曰法弟  
蓋其人曾官宣教郎而中年出家者

克齋詞跋

克齋詞題曰苕溪沈端節舊抄本提要云溧陽志載  
端節寓居溧陽嘗令蕪湖知衡州提舉江東茶鹽漕  
熙間官至朝散大夫其說必有所據愚案端節乾道  
三年任蕪湖縣丞加意民瘼時大旱禱雨有感建志  
喜齋于神山後升蕪湖知縣見太平府志蕪湖縣志  
蓋克齋亦當時循吏非僅以詞見長者余前修湖州  
府志未爲補傳深愧疏漏因備箸于此

儀顧堂續跋卷第十五

歸安陸心源伯剛甫著

邊鸞杏花鷓鴣軸跋

邊鸞杏花鷓鴣直幅紙本重設色高一尺九寸廣一尺二寸四分有黃琳國器書畫府印朱文長印黃琳美之朱文方印休伯朱文方印澹軒白文橢圓印李應禎項騏題于詩斗案黃琳字美之一字蘊真上元人官錦衣衛指揮家有富文堂藏書畫有王維著色山水王維伏生授書圖都元敬驚爲未見見客坐新譚及朱述之金陵詩徵停雲館所刻趙子昂與中峯

札亦有黃琳美之印三希堂帖所刊尤多清秘藏歷代賞鑒家亦列其名其鑒賞之精可知蓋宏正時一大收藏家也澹軒爲元王若水軒名李應禎初名姓以字行原藉長洲徙上元景泰癸酉舉人官至南京太僕少卿頃麒成化時人官南京刑部郎中皆有書名邊鸞畫世不多見此幅濃厚工細栩栩如生斷非宋以後人所能既有李項題詩又經王澹軒黃美之鑒定其爲真迹無疑

米元章字冊跋

米南宮書將之苕溪呈諸友詩二章居半歲借書劉  
李周三姓四章題元祐戊辰八月八日襄陽漫仕獻  
下蓋朱文方印曰米芾圖書每葉紙長一尺七分廣  
八寸半歲依修下缺二頁存二十一葉後有米友仁  
跋及內府圖書朱文方印睿思殿印朱文方印紹興  
二字連珠朱文印秋壑二字朱文橢方印與郁逢慶  
題跋記所載不同逢慶所記襄陽漫仕米獻六字在  
呈諸友下末題元豐戊辰八月八日作愚案諸友詩  
是未到苕溪時作借書劉李周三姓詩是居苕溪半

載後作相距甚遠若借書詩是八月八日作則將之  
茗溪詩當在正二月作不得統題八月八日作以此  
証之逢慶所記其贗無疑矣郁氏續集載李西涯跋稱  
有紹興及睿思殿印後見吳門蔣氏刻本有紹興二  
字朱文印及睿思殿朱文印書殊不佳當卽逢慶箸  
錄之贗本也此冊爲高宗內府物悅生別錄云凡宣  
和紹興內府物似道往往乞請得之此秋壑印所由  
來也元祐戊辰米老四十二歲故其書姿媚而不放  
縱與章吉老墓志墓表蕪湖學記有中晚之別其爲  
真跡則一也

郭河陽溪山行旅卷跋

郭河陽溪山行旅圖卷絹本長一丈二尺三分高一尺二寸五分山水繁迥樹林疏曠木葉多脫石骨半露屋宇不高上覆以茅兩旁累瓦脊壓以磚有閣臨水下樹木椿疊木爲橋其上蓋土皆北方景象非南中所有驢十頭或負載或騎人八十有坐者立者步者騎者杖者隨者擔荷者負傘者攜物者戴笠者問路者指視者渡橋者人各不同神情畢肖後署款曰河陽郭熙前有周密公謹之印白文方印周氏文種堂白文長印後有宣文閣半印項叔子三字白文方



印項墨林三字白文方印愚案雲烟過眼錄載蘭坡  
趙與勤所藏有郭熙溪山行旅卷後云以上書畫止  
是短卷大者不在此數其中多佳品今散落人間者  
皆是也是草窗作過眼錄時其書畫已散出此卷必  
爲草窗所得故有周氏二印書種志雅二堂爲艸窗  
父晉藏書籍書畫處印文作文種想後又有更易此  
非淺人所知必非僞印且印泥已駁落非細審不明  
清河書畫舫云郭熙畫法源出李成晚年尤號超逸  
其溪山行旅圖真本元初趙蘭坡故物今在構李項  
氏秀勁可愛今此本有項氏藏印其卽蘭坡所藏過

眼錄所載米菴所記無疑也宣文閣爲元時收藏書畫之所柯九思曾官宣文閣鑒書畫博士元內府物往往經其鑒定蓋宣文閣鑒書畫博士印印分三行行三字卷末宣文閣半印卽此印之首行而缺後二行是則未歸項氏之前又當入元內府矣畫法靈秀山石皆水墨渲染絕無筆墨痕迹吾友胡石查司馬謂石谷學之得其形模而神韻則萬不能及洵篤論也

王居正紡車圖跋

右王居正紡車圖長工部尺二尺二寸四分高八寸五分中置紡車老嫗坐而轉車旁置竹筐犬蹲于前童子竿蟾蜍蹲于後老嫗牽絲對車立後角下有悅生朱文胡蘆印似道朱文方印是畫曾藏龔蘅圃家朱文長印珊瑚網著于錄原有子昂兩跋今佚跋云賈師相故物圖雖尺許氣韻雄壯命意高古精采飛動今卷末有悅生二印氣韻画意亦與趙跋合其印子昂所藏無疑圖贋本甚多是卷既有賈印又經蘅圃玉方素邨諸家鑒藏後之觀者勿以失跋疑之也

蔡忠惠尺牘跋

蔡忠惠尺牘澄心堂紙高八寸二分闊一尺前題九月十八日襄奉書後題襄再行留台同年屯田兄足下留台者判留都御史台也宋史職官志三京留司御史台管勾臺事各一人舊名判台以朝官以上充掌拜表行香糾舉違失中興以後不置同年者忠惠進士同年也忠惠天聖八年進士攷歐陽文忠劉沆元章簡皆與忠惠同舉進士宋史有傳無爲屯田郎及判留台事劉奕劉昇翁紀黃珣皆忠惠同鄉同年奕昇珣皆累官屯田員外郎紀官檢校屯田郎中

見福建通志選舉表人物傳亦無言判留台者忠惠與劉奕尺牘有稱屯田二兄者此札或亦與劉奕然無判留台確証未敢決耳再行者宋人正啟用四六別紙則以散行此是別紙故曰再行忠惠集啟箋之後有別紙一門是其証也前有江上外史朱文方印潤州笄重光鑒定印朱文方印廣陵李書樓珍賞圖書白文方印文武世家朱文方印宋人論書以蔡忠惠爲第一洪容齋朱文公晁昭德劉後村林竹溪皆云然虞道園謂君謨有前代筆意至坡谷而晉魏之法盡論者推爲宋代第一殆以此歟公書頗自珍惜

不妄與人見歐陽文忠所爲墓志故七百年來流傳  
尤少王弇州最號博收僅得安樂扶護二帖秀水項  
氏所藏尤廣亦祇二帖文氏借摹刊入停雲館帖見  
紅雨樓集此札道勁端麗有唐人遺則証以停雲館  
刻筆意悉合又經江上外史鑒定洵無疑義余搜羅  
三十年宋代名家法書蘇有昆陽城賦黃有晦堂開  
堂疏米有大字將之苕溪詩久以無蔡爲憾近費昶  
懷太史典試浙江請急過蘇爲余和會得之誠吾家  
鎮庫至寶也

黃文節書晦堂和尚開堂疏跋

山谷書晦堂開堂疏長二丈一尺六寸高六寸二分  
宋黃蘗箋五接題云龍黃清禪師云江東西士大夫  
知晦堂和尚是真歸依處本由德占發之追考其功  
故欲書此文於卷以便覽者崇寧元年七月壬辰山  
谷黃庭堅題前有洪焯題後有陶宗儀鄭元祐跋李  
東陽陸完觀款案疏文爲徐禧作禧洪州分寧人宋  
史有傳德占其字也疏作于元豐五年見羅湖野錄  
晦堂名祖心始興鄒氏子住江西黃龍寺名其方丈  
曰晦堂人呼爲晦堂叟嘗舉論語吾無隱乎爾請山

谷詮釋至於再而晦堂不謂然山谷怒時暑退涼生  
秋香滿院晦堂曰聞木樨香平山谷曰聞晦堂曰吾  
無隱乎爾山谷欣然領解身後山谷爲作塔銘見禪  
燈錄及內集清禪師名維清武甯陳氏晦堂弟子也  
自號靈岩叟山谷嘗爲作像贊又寄詩示絕有云騎  
驢覓驢真可笑以馬喻馬亦成癡一天月色爲誰好  
二老風流只自知見內外集及江西志考山谷年譜  
是年年五十八六月知太平州九日而罷七月甲午  
後繫舟達觀臺下八月復至江州壬辰在甲午前二  
日此疏當是由太平至江州時舟中所書也黃龍寺



在今義寧州宋之分寧縣也山谷自云紹聖甲戌在黃龍山中忽得草書三昧是年九月又自巴陵取道通江入黃龍山訪維清爲之編閱南昌集見內集卷十九及年譜宋時刻石于寺拓本罕見黃書偽迹遍天下如梵志詩明時已有兩本見張丑真迹日錄此本遒健縱肆紙厚如錢又經陶南邨鄭僑吳李西崖陸水邨諸公鑒定其爲真迹無疑書畫彙攷著錄之本無陶鄭李三跋而有唐寅印記恐摹本耳

范華原烟嵐秋曉卷跋

右范華原烟嵐秋曉圖絹長工部尺一丈九尺五分  
高一尺二寸八分自近而遠自密而疏山則有帖有  
闢有畧有罄有仄有自有岑有巒水則有林有次有  
谿有澗有澗有澗有限有濬人則或坐或立或負或  
擔或漁或農或老或少屋則或茅或簷或簷或廛或  
亭或樓或塔或閣樹則熒然而丹赭然而黃焉然而  
蔥翠粲然而琴儷涉渡之梁負戴之驢行旅之舟曲  
折之逕層見而疊出迤邐而不窮宋徽宗瘦金書題  
其上曰范寬烟嵐秋曉圖己丑御覽下有天下一人

押押下蓋御書朱文胡盧印後蓋宣和御覽御府之  
印朱文兩方璽前有雙龍圓璽登聞鼓院之印朱文  
方印墨林主人白文方印子京朱文胡盧印平生眞  
賞朱文方印項墨林鑒賞章朱文長印子京父印朱  
文方印神品朱文連珠印墨林子朱文長印退密朱  
文胡盧印□□印章朱文方印賜錦老人白文方印  
項子京隨字編號書於左角下後有緝熙殿寶朱文  
方璽天籟閣朱文長印橋李朱文圓印子孫世昌白  
文方印元汴朱文方印弘遠朱文方印項叔子白文  
方印吳郡□□□印白文方印賜錦白文騎縫半印

及墨林主人項子京家珍藏子京父印子京四印後  
有楊士奇跋下蓋廬陵楊士奇朱文方印項元汴跋  
下蓋元汴朱文方印及項氏藏印九攷宣和畫譜山  
水門載范寬烟嵐秋曉圖二此題已丑御覽爲大觀  
三年所題其卽宣和殿所藏之一無疑也峯巒渾厚  
草木華滋筆筆中鋒如作篆籀傳色沈厚氣局雄闊  
以所藏沈石田有竹居卷証之皴法樹法界畫人物  
設色勾勒無一不同石田蓋全師之楊東里推爲第  
一妙筆項墨林推爲生平傑作知言哉墨林所藏散  
於明季此卷二百年來流傳人間仍不出嘉禾境髮

逆亂後始爲嘉興守許雪門所得雪門身後歸之知  
海寧州曾星槎星槎知此卷之可寶而以左角下隨  
字爲疑己丑秋大兒樹藩次兒樹屏赴試秋闈余亦  
偕行遇星槎於武林出以相質余笑曰君能以此卷  
讓我當爲君言其故星槎漫應之及余告以項氏千  
字文編號乃始恍然星槎君子人也不肯食言卷遂  
歸余償以原值白金三百銖星槎名壽麟湖南邵陽  
舉人宰山陰八年廉靜公正所去民思今春已作古  
人執筆題此良用盡然

小米墨戲卷跋

右米友仁畫紙長工部尺二尺三寸四分高五寸七分  
山色溟濛烟樹掩藹瓦屋五間爲樹所蔽僅露屋  
脊後有宗夏題下蓋白雲山舍白文方印錢惟善題  
下蓋思復朱文方印費恂題無印前有季振宜印朱  
文方印滄葦朱文方印卞令之鑒定朱文長印後有  
令之清玩朱文方印雲卿白文方印廷韓甫白文方  
印平石無夢字文公諒題于別紙平石之印曰契此  
里人公諒之印曰字文子貞子貞印似印而加蓋者  
前有式古堂書畫朱文長印後有令之朱文方印仙

客朱文方印與書畫彙攷所載合惟彙攷稱長二尺  
二寸高五寸微有不同余所用乃工部營造尺卞所  
用疑是裁衣尺故有參差耳張米菴謂高米水墨雲  
山皆數十百次積累而成非後人草率點染所可同  
類而觀此畫純用濃墨層層點染斷非元以後人所  
能小米雖無題字印記而元人平石無夢子貞三家  
皆定爲米畫又經莫雲卿季滄葦卞令之三家鑒定  
令之又收入彙攷可信其爲真跡也公諒字子貞湖  
州人元史有傳平石無夢二人俟攷

李龍眠十國朝貢圖卷跋

右絹十接長工部尺九尺七寸八分高六寸四分所  
畫十國曰字款曰白字羅曰崑崙曰朝鮮曰女直曰  
九蠻十八洞曰三佛齊曰登樹綱曰漢兒江曰女送  
皆書于旗上文直卽女真也後署款曰李公麟造人  
二百二十有九官吏臧獲士卒輿人馬夫婦女之儔  
不一其類冠巾纓笠衣裳袴褶靴履薙髮辮髮束帶  
垂帶之制不同其國行者立者乘者騎者牽者驅者  
負者戴者扛者持者攜者捧者迴顧者偶語者拍手  
者吹者擊者佩者前驅者後擁者展帛爲輿懸兩端



于木二人昇之者人事不同其貌亦無一同者獸則  
馬二十羊十象一獅一物則若旗若旆若旌若節若  
麾若蓋若弓若刀若劍若矛若矛若珊瑚若瑯玕若  
盤若壺若幃若屏若俎若篚若筐若篋若束帛若囊  
鞬間見而眉出筆勢簡勁意態生動實爲見所未見  
每段有李鉉私印白文方印吳逸士宋子虛朱文方  
長印原本似是長卷僉父割而爲冊上下亦有割損  
故圖中旗幟有僅存下半者湯貞愍隸書額其端曰  
李龍眠十國朝貢圖神品別紙有趙仲穆跋蓋仲穆  
朱文方印王達善跋蓋王達善氏朱文長印皆真跡

僧六舟何子貞太史又跋于別紙劉後村見于林竹溪家者日本于闐三瞳日南天竺第林堅昆波斯等十國與此十國不同攷宣和畫譜載龍眠十國圖二是龍眠所畫原有二卷此圖疑卽宣和所藏之一當有宣和御題御印均爲僞父割損耳或有疑爲添款者攷女眞之名箸于唐末宋初後改號曰金不復稱女眞今圖有女眞國則爲徽宗以前所畫無疑神哲之際擅白描者更無妙手則此畫舍龍眠其誰乎況趙仲穆王建善兩跋未子虛鑒印可信又經貞愍子貞達受賞鑒其爲眞迹無疑

朱文公顏淵註稿跋

朱子論語顏淵篇集註稿自問君子註起至君子以  
文會友章註止中缺棘子成曰章至盍徹乎經註存  
二十九紙每紙直烏絲欄六行高工部尺八寸五分  
闊四寸小行草書經頂格註低一格添註塗改甚多  
證以所藏上時宰二劄筆意雖同此秀潤而彼蒼老  
蓋論語註創稿於三十後劄則五十以後所書年有  
老少字亦有枯潤其爲真迹則一也後有吳匏菴唐  
六如兩跋陸氏吳越所見書畫錄著於錄尺寸微有  
不同者所用之尺不同也

陳居中文姬歸漢圖跋

陳居中文姬歸漢圖絹本長工部尺二尺五寸三分  
高六寸三分題曰陳居中畫凡番官九番女五文姬  
坐于車中馬十一駝一駕車于上南宋人畫駱駝往  
往蹄與馬蹄同番女髻亦不類昔人以爲話柄此卷  
番女之髻如牛角長倍于首與南薰殿圖像攷所載  
元皇后冠同駝蹄不作馬蹄形畫法甚古居中嘉泰  
時人未嘗身至北地當必有所本也前有珍賞圖書  
朱文方印琴書堂白文方印後有耿會侯鑑定書畫  
之印朱文方印信公珍賞朱文方印嘉禾周鼎海昌

蘇平題于別紙有耿都尉信公書畫之印白文方印  
子子孫孫永寶用朱文方印審定真迹朱文方印皆  
康熙中耿信公收藏印也周鼎字伯器嘉興人正統  
中沐陽典史書法瀟灑見書畫謹蘇平字秉衡海鹽  
人景泰十才子之一見明詩綜信公名昭忠一字會  
侯號在良遼東人靖南王仲明之孫嗣王繼茂之子  
逆賊精忠之弟也順治賜昏哆羅縣主爲縣主額駙  
累官太子少師太子太保鎮南將軍謚勤僖工藝事  
精鑒別圖書鼎彝炤耀几席見徐乾學澹園集耿公  
墓志蓋康熙間一收藏家也

趙千里春江待渡圖卷跋

右趙千里春江待渡圖絹高工部尺一尺一寸八分  
長九尺七寸七分首畫山嵐重峻花樹叢深林中瓦  
屋整齊陳設精緻一人倚案立一人坐而聽一室設  
二朱杌二人對坐於中跨隄系石爲磴一人攜壺而  
登一人盪舟谿中谿邊茅屋兩三家編竹爲籬隔谿  
有亭息者二人彌望山中緋桃爛然古松夭矯迤邐  
不絕松下瓦屋中有三人似隱居者一人臨崖扶杖  
眺望崖下茅屋數椽舟泊于門渡約略立而若問訊  
者二人隔岸牧童騎牛橫笛小牛尾之一人荷耒自

山後來次有石橋跨谿一紅衣人杖而登一童攜琴從其旁高峯入雲瀑布逾重山而下注于谿面瀑作亭二人坐而觀一童依柱立山後寺觀壯麗樓閣崇閣下臨行路二人擔而趨二人雁行一童從若皆將赴渡者谿有二舟一在谿中一人篙而前一人坐鵝首一人持柁于尾一舟近岸一人持篙若將行者山之麓層樓二門臨石橋一人杖而過一人擔而從若渡而來者村居六七家憑牖坐者一人屋外望者一人一人將叩門犬隨其後一人竿而驅二驢三馬負戴前行亦將赴渡者次臨路十餘家浮屠轟于後山

之巔行人五一人擔一人負若將赴渡者一人拱而  
顧一人杖一人負若渡而來者隔谿二人荷鋤並行  
居者五人四人憑牖觀一人當門立門前繫二舟踰  
木橋坡上人十有四立者坐者趨者擔者負者回顧  
者偶語者弛擔而息者渡船五其二半隱於岸樹林  
蔽處露十餘檣焉船上人十餘舉桅者撐篙者解維  
者理索者持柁者立而指者坐而觀者渡口有山上  
有樓如城江中行舟二各張前後帆舟不一人人不  
一事後署款曰千里伯駒前有鄭氏明德朱文方印  
許氏元復朱文方印後有史氏曰鑑堂珍藏白文長



印雲間何氏叔昆攷藏印朱文長印墨林生朱白文  
方印喬氏蕢成白文方印完菴朱文方印攷珊瑚網  
載史明古所藏有趙千里春江待渡圖此卷雜花生  
樹紅桃爛然待渡情景宛然在目又有史氏藏印其  
卽明古所藏珊瑚網所載無疑也黃志雲跋于別紙  
其趙仲穆鄭明德二詩疑爲後添千里僞跡甚多此  
卷緞法樹法全學右丞精細古厚非千里不能又經  
元喬仲山鄭僑吳明許元復史明古項墨林諸家鑒  
賞其爲真迹無疑

劉松年琴鶴圖跋

右劉松年畫絹長工部尺一丈五分高一尺七分首  
畫坡樹水石跨以石梁梁上策杖而行者一人一童  
負而隨其後一人拱而前行已過石梁數十武回顧  
若前導然二鶴相對鳴于坡上屋宇背山近水中設  
一几兩杌几上書兩帙爐一瓶一兩人對坐而談一  
童攜琴將及階白鶴一舞于庭次陂陀竹樹白項鳥  
十二棲于樹者十其二展翅而下將止于樹後署款  
曰畫院待詔劉松年繪前有金章宗內府之印朱文  
方璽羣玉中秘朱文璽子京朱文胡蘆印項子京家

珍藏朱文長印後有乾坤清氣朱文方璽西楚王孫  
朱文方印平生珍賞朱文方印項墨林跋于別紙有  
退密朱文胡盧印墨林署款已缺蓋墨林所藏每于  
署款處註年月得價估人欲得重值惡其害已因並  
署款而去之耳後有楊東里題下有朱文方印曰士  
奇之印前有橋李朱文圓印子京珍藏朱文方長印  
楊跋項跋本一紙後人割去項款遂分爲二矣畫中  
士人衣服皆作唐宋粧惟頭上非冠非巾以帛束之  
髻垂向後長過于首非唐宋所有攷金人辨髮之制  
史所不詳李心傳建炎以來繫年要錄屢敘雍髮之

事亦不言其制帛巾所束疑卽辨髮與今之垂於背者略異其殆金人燕居冠服歟章宗明昌元年卽宋光宗紹熙元年暗門于瀋熙中爲畫院學生紹熙中待詔賜金帶是松年待詔之日正章宗在位之時其時宋金無隙使命往來不絕于道或松年受金使之指所繪後進于章宗故有章宗印璽歟藉此可以攷見金人燕居衣冠之制不僅其畫之可寶也趙清獻公以一琴一鶴自隨傳爲佳話後世士流慕之多爲琴鶴之圖于京以其有屋必名之爲琴鶴軒陋矣今改題爲琴鶴圖庶平近之

張樛寮書大方廣佛華嚴經卷七十一跋

右紙十接長五丈七尺四分高一尺一寸梵經式六十二葉葉二十行行十五字烏絲方格字幾及萬始終一筆不懈其全部在

內府缺六卷杭州朝陽寺有三卷見太平清話此卽朝陽寺三卷之一道光中爲烏程鈕明經福惇所得明經身故歸於余其漆板裂紋如古琴面刻大方廣佛華嚴經第七十一字亦樛寮書非卽冊之首行摹刻者七百年來裝池無恙尤爲難得尙有二卷今歸沈仲復中丞不及此冊之完善也

王朋梅金明池龍舟圖卷跋

王孤雲金明池龍舟圖絹長七尺九寸八分高一尺  
三分大樓一樓之下一層扁曰寶津之樓殿一亭三  
皆重簷亭一在殿前一在殿後一在樓前池中石臺  
長倍于闊者百周以石欄樓殿及亭峙焉中跨環橋  
亦輦以石重樓龍船一向石臺而來小龍船十有六  
二尾樓船行其一先之餘皆迴旋臺左右小舟三一  
載雀籠一載小孩一繫于重樓之下鞦韆船二木魚  
船二皆在橋兩旁人三百有七立者拱者望者倚者  
浮者斧者矛者旗者旌者纛者梃者漿者舞者鼓者

金者笛者籠鳥者執笏而朝者排班而侍者大者盈寸小僅數分樓後石臺之下署臣王振鵬四字後有振鵬隸書跋署曰至治癸亥春莫廩給令王振鵬百拜敬畫敬書蓋孤雲處士圖書朱文方印前後有皇姊圖書朱文方印末存韓印二字白文半印孤雲于至大庚戌先爲仁宗作此圖閱一紀又爲大長公主作此圖清河書畫舫箸于錄原有李原道等十四人題跋今已失書畫舫載有韓逢禧諸人印富在裱褙騎縫之際故今祇存韓印二字半印耳大長公主者魯國徽文懿福眞壽大長公主也順宗女仁宗姊適

帖木兒子凋阿兀刺見元史公主表收藏書畫甚多  
今所流傳尙不止此圖每見明代贗鼎皆濃俗可厭  
是卷工細之中仍饒士氣閱之令人驚心動魄虞道  
園謂永嘉王振鵬妙在界畫運筆和墨毫分縷析左  
右高下俯仰曲折方平直曲各盡其體而神氣飛動  
不爲法拘愚謂郭恕先之後蓋罕其匹斷非明以後  
人所能諸跋雖失無害其爲真迹也明嘉靖時爲分  
宜所得籍沒後以折俸歸韓存良太史崇禎中歸張  
米菴道光中萬廉山司馬以重值得之因此獲罪于  
琦相然則題跋之失當在髮逆亂江南時矣



黃文獻袁通甫墓誌跋

故靜春先生袁通甫墓誌銘題金華黃潛撰烏絲闌紙本三十行行二十六字吳訥跋以爲文獻親筆余疑前無結銜後無印記非書丹式近閱徐一夔始豐稿卷十四引待制王禕之言曰公凡爲文脫稿必命門生代書而碎其初稿公字畫甚佳以秘惜故多不傳云云則此稿信非文獻手書而爲門下士代書矣惟元刊金華黃先生集寺記塔銘連篇累牘通甫文行甚高誌反不收且旣不惜其文而反秘其書殊不可解耳

俞紫芝四體千文跋

俞紫芝四體千文末題至正十又五年夏六月廿二日紫芝生俞和寫于黃岡之隱居下有俞餘二字朱文方印俞子中父白文方印紫芝生三字白文長方印烏絲闌紙本六十一葉每葉騎縫有墨林二字白文長印後有樵李項氏士家寶玩九疊篆朱文長方印項元汴印朱文方印墨林山人白文方印子京父印朱文方印墨林秘玩朱文方印項子京家珍藏朱文方印項墨林鑒賞章朱文長印前有賜進士蘭台逸史姚公綬書紫芝墨妙四字畫紫芝獨立小像一

葉芝草一葉當爲雲東所藏而後歸墨林者案俞和  
字子中自號紫芝生本嚴之桐廬人父章遊錢塘因  
家焉少時得見趙文敏用筆之法極力攻書日益有  
名篆隸行草各臻於妙一紙出用趙文敏私印識之  
人莫能辨其真贋壬辰之亂避地隣縣之黃岡嘯傲  
于海風山月之間久之乃還故廬故舊凋零喚酒獨  
酌賦近體詩歌長短句援筆書之以寫無聊不平之  
思而草聖猶飛動如初洪武十五年三月七日卒年  
七十六見徐一夔始豐稿俞子中墓誌是黃岡者錢  
塘隣縣之鄉名非湖北之黃岡縣也海寧有黃灣徐

一變避地嘗居之至正壬辰徐壽輝陷杭州遂及餘杭武康德清於潛安吉惟海鹽無恙墓誌有嘯傲海風山月語黃岡地必近海意者黃灣卽黃岡歟王叔爲至正十二年墓志云久之乃還故廬其居黃岡必非一年證以題款年月時代悉合子中生于大德丁未至正十五年年四十九若晚年則草聖雖如初篆楷或不能復作矣冊爲無錫故家舊藏費屺懷太史爲余介紹得之太史賞愛紫芝小像及芝艸兩葉卽以贈之時閱五百餘年紙墨雖舊完善無缺惜草體爲僞父影摹所污耳紫芝錢塘人雲東墨林皆嘉興

人不知何時流入錫山今歸穰梨館歷元明及  
本朝而收藏不出浙西翰墨因緣信非偶然

儀顧堂續跋卷第十六

歸安陸心源伯剛甫著

消夏錄載司馬端衡米元暉合卷跋

消夏錄載司馬端衡與米元暉合卷其印文曰司馬次仲之孫後有王珉田如鼇王與道富元衡四跋下令之書畫彙攷不列其名豈以端衡不見史傳又不見畫史會要而疑之耶愚案端衡名槐夏縣人官參議行六十五抱才負氣其少壯值徽宗時黨人子孫不得仕進遂放意于画落筆高妙有顧陸遺風論画終日衮衮如孫吳談兵臨濟趙州說禪以画得名紹

興初陸放翁尤及見之稱之曰丈必生于北宋而卒于南渡後者見渭南文集傳燈圖跋樓攻媿集趙氏所藏大士跋觀田如鼇跋端衡實溫公之孫然溫公字君實史傳神道碑年譜均不言又字次仲惟公兄旦字伯康則公字次仲亦宜公二孫長名植次名栢見范太史集司馬康墓誌而無槐豈植栢二人後又改名槐歟疑莫能明也王珉字中玉玉山人政和五年進士紹興中官侍郎寓居衢州田如鼇字癡叟南安人宣和六年進士江西通志有傳富元衡蘇州人姑蘇志有傳

吳越所見書畫錄所載山莊義訓圖跋

所見書畫錄載有李伯時山莊義訓圖後有半江華  
淞跋王澐跋以奕京方奇亮育爲伯時子致爲伯時  
女以愚攻之蓋奕京方奇亮育乃金華潘竹隱之子  
致乃竹隱之女所畫乃七進圖也七進者猶枚乘七  
發之類爲潘祖仁作其文載吳師道敬鄉錄與此皆  
同惟多首一段其文曰奕方作真游子賦相酬荅意  
敬慕古人作者念其無所依倣戲爲七進以示之歲  
在荒落月紀仲呂竹隱老人晝臥於家愴恨鬱悵眊  
瞢寂默沈吟憎欲寤寐太息兒曹憂之聚而謀曰翁



之戚甚矣。蓋相與寬之。于是推次序列。搜意屬詞。長跪稽首。造于燕私下。接奕奉觴。進曰云云。此本無之。蓋後人不知竹隱爲何人。欲僞題龍眠名。故刪之耳。攷吳禮部集卷十二有七進圖記曰。七進圖者。畫金華潘氏父子也。竹隱老人名祖仁。字亨父。子奕。女玫。子京。方奇亮育。七人首畫一竹牀。老人衣冠臥文簟上。右手支頤。左手撫膝。熏爐塵尾置旁。草屐陳下。六子一女環侍。次畫奕奉觴。進一隸袒裼。右提酒壺。左持其格。次畫二女御踵行。次人背面捧槃中芍藥。前人以右手扶槃花。隱其手。次女玫在後。目持花一枝。

重臺特起異於槃中者次畫京拱而行从隸以竹枝  
貫雙魚于盤置刀一帶葉橙一醢器一捧以獻次畫  
茶具列供事者數人一童跪地垂手持碾困睡或撚  
紙觸其鼻微醒欲噓方坐瓦具上以甌授附于爐者  
將淪茗也次畫奇導引一老奴左襁負棋局右手挈  
籃中圓器貯子者也次畫亮捧五木以趨次畫竹間  
一室簾牖明整几格積羣書有迎立以請竹風蕭然  
老翁舉兩手整巾帶而行六子暨童奴八人導从前  
後蓋竹隱文規模枚叔而藻麗出新意書以漢隸亦  
工每段次畫于文用李伯時白描法精絕似之然未

有考也竹隱後贈中奉大夫奕後名良佐字致君贈通奉大夫京後名良貴字義榮一字子賤政和五年進士官徽猷閣待制中書舍人自號默成居士方後名良瑗字仲嚴終太學生奇後名良翰字叔倚紹興十五年進士官至太府寺丞倅平江府亮後名良知字叔愚早卒育後名良能字季成登紹興五年第官秘書省正字江州倅默成常自稱兄弟六人又云吾母生子十有二人長女適錢經國稱之爲姊卽玟是也紹興乙卯默成自左史除西掖竹隱已九十次年卒予旣从潘氏借觀因略記之據此則其畫當有八

段華滋跋祇見迎風嘯傲之老人不見牀上之老人  
不但文缺首一段卽畫亦缺首一段矣骨董家一涉  
考證往往郢書燕說此其尤甚者也

江村消夏錄所載刁光胤畫冊跋

消夏錄載五代刁光胤畫冊有乾道元年御題其蝶戲貓圖題句有後村詩與涪翁詠一句愚按劉後村生于孝宗淳熙十四年丁未卒于咸淳五年己巳年八十三見林希逸竹溪集後村行狀乾道二年戊子前乎淳熙丁未凡二十年是時後村尚未生孝宗何得見其詩乎其僞無疑也

沈石田山水卷跋

右沈石田設色山水卷絹本有石田二字白文方印  
后南二字朱文方印吳匏菴五古一章題于別紙題  
曰延陵吳寬題于森若葉氏之青霞閣下有吳寬二  
字匏菴二字朱文方印匏菴題石田畫集中凡十餘  
章或曰石田生或曰沈子或曰沈郎或曰石翁或曰  
吾鄉沈石田或曰石田高士皆指其人以實之不泛  
題畫景而已此云石田沈徵君同一例也葉氏森若  
無考家藏集卷十六有與葉翁遊小城南詩卷十七  
有與葉翁看牡丹詩卷十八有葉翁以叢竹分種因

題墨竹謝之詩卷二十三有東隣葉翁送牡丹詩卷二十九有中秋夜與葉翁飲詩森若疑卽其人詩系應酬之作森若非文人學士故集中不收其爲真迹則無疑也家藏集乃匏菴手定刪除甚多石田筆力雄厚揮灑滿紙往往無餘地署款僅蓋印章題於別紙若以石田無款匏菴集無詩而疑其僞則愼矣卷經金文通之俊收藏有息齋二字朱文方印太傅大學士章白文方印息齋文通自號也箸有息齋文集

石濤贈石溪冊跋

右石濤山水冊十二葉每頁有題有阿長清湘石濤  
搜盡奇峯打草稿贊之十世孫清湘老人元濟苦瓜  
瞎尊者前身龍眠濟等印其一頁題曰呈石頭先生  
博笑其一頁題曰石頭先生年道長并正其一頁題  
曰時癸未秋日爲石頭劉先生作畫拈出請正曰并  
正曰拈出請正其人當亦能畫者以思考之此冊蓋  
爲石溪作也案石溪名髡殘字石溪一字介邱號白  
禿又稱殘道者武陵人住金陵之牛首寺俗姓劉幼  
有夙慧不讀非聖之書後棄舉子業而爲僧見讀畫



錄青溪遺集畫徵錄諸書蓋亦明之遺民也石濤爲  
楚藩後裔自稱清湘老人必分封於沅湘間者二人  
生旣同時又同鄉里後又同居金陵同爲明室遺民  
同工詩畫同逃于禪相契必深其爲石溪作無疑也

楊忠烈家書跋

右明楊忠烈公家書紙本高九寸長二尺九寸首題  
曰字與之易之賦之言末題九月十九日字有晏如  
主人四字白文方印凡三十行每行約十七八字案  
忠烈諱鏈字元孺號大洪湖北應山縣人萬厯三十  
五年進士除常熟知縣官至右副都御史天啟四年  
疏劾魏忠賢二十四大罪五年忠賢矯旨逮公死詔  
獄年五十四崇禎初謚忠烈見明史二百二十四卷  
之易字元仲公之子也公被逮欲赴闕上書請以身  
代公力止之順治初官江南松江府同知亂賊據南

匯討平之四年松江提督吳勝兆叛之易罵賊遇害  
照例優卹事聞贈按察司副使見湖北通志楊忠烈  
公集有獄中遺易兒書卽其人也明史本傳載公于  
萬厯四十三年二月抗章乞去卽出城候命帝褒其  
忠直而許之歸天啟二年起禮科給事中旋擢太常  
少卿書中有無功無勞叨冒卿貳語則此爲公起復  
入都擢太常少卿時家書無疑也九月十九日者天  
啟二年九月十九日也太太者公之母史稱公身後  
母妻棲止譙樓是公殉國後太夫人尙在也大爺者  
公兄清也清應山諸生與漣同讀書山中慕里中二

宋二連人以宋連目之以貢歷金華府同知公被難  
清罷職家居事雪後同知衢州府致仕見湖北通志  
公自號晏如主人其兄清曾由貢生官南京助教通  
志皆未詳可據以補其缺

朱文肅溫寶忠董伯念手札跋

右朱文肅家書四通溫寶忠札三通董伯念札三通  
烏程周芸齋別駕所藏也文肅以位顯寶忠以忠著  
伯念以氣節重皆吾郡有數人物寶忠札多憂時感  
事之言其于員嶠無貶辭亦非阿其所私蓋員嶠雖  
嫉賢害能而鑒于周延儒之獲戾頗能謝絕苞苴避  
嫌遠疑明社未亡公論未定寶忠亦不能不爲親者  
諱也伯念三札雖無大關係而豪俠之氣流露行間  
可以覘其所造余皆已錄八稜梨館過眼錄惟文肅  
忝居高位無補時艱書中亦多踉蹌語故不錄

高句麗廣開土大王談德紀勳碑跋

後漢書東夷傳初北夷索離國王出行其侍兒於後  
隻身王還欲殺之侍兒曰前見天上有氣大如雞子  
來降我因以有身王囚之後遂生男王令置于豕牢  
豕以口氣噓之不死徙於馬蘭馬亦如之王以爲神  
乃聽母收養名曰東明東明長而善射王忌其猛復  
欲殺之東明奔走南至掩淲水以弓擊水魚鼈皆聚  
浮水上東明乘之得渡因至扶餘而王之焉三國誌  
注引魏略略同魏書高句麗出于扶餘自言先祖朱  
蒙母河伯女爲夫餘王閉於室中爲日所照引身避

之日影又逐既而有孕生卵大如五升有一男子破殼而出餘與後漢書略同爲隋書及文獻通攷東國通鑑之所本與碑云天帝之子母河伯女郎剖卵降生由路夫餘奄利水爲木連嶺浮龜塵聲卽爲連嶺浮龜然後造渡合鄒牟疑桂婁之譯轉三國志高句麗有五族有消奴部絕奴部順奴部灌奴部桂婁部本涓奴部爲王稍微弱今桂婁部代之是也儒留王名類利東國通鑑作琉璃明王永樂大王之名不見于外國記載乃當時國人之尊稱耳東鑑三國記高句麗談德薨號廣開土王與碑稱廣開土境好大王

合則此碑應題爲高勾麗廣開土王談德紀勳績碑  
案東鑑晉太元十七年壬辰三月高勾麗王伊連薨  
太子談德立碑稱永樂五年歲在乙未則談德當立  
于辛卯年非壬辰實晉太元十六年也東鑑又載壬  
辰秋七月談德帥兵四萬攻百濟北鄙陷石峴等十  
餘城冬十月攻陷百濟關彌城與碑合惟碑稱六年  
丙申鑑系之壬辰差四年蓋三國史爲高麗王氏臣  
金富軾所箸當中國宋徽宗時時代旣遠文獻殘缺  
皆當以碑爲正十七世孫者孺留王之十七世孫也  
東鑑記類利薨子無恤立號大武神王爲一世無恤



死子解邑朱立號閔中王爲二世解邑朱死無恤子  
解憂立號慕本王爲三世解憂被弑類利之孫宮立  
號太祖王爲四世宮傳位于弟遂成號次大王爲五  
世遂成弑弟伯固立號新大王爲六世伯固死子男  
武立號故國川王爲七世男武死子延優立號山上  
王爲八世延優死子位居立號東川王爲九世位居  
死子然弗立號中川王爲十世然弗死子藥盧立號  
西川王爲十一世藥盧死子相夫立號烽上王爲十  
二世相夫死弟咄固之子乙弗立號美川王爲十三  
世乙弗死子斯由立號故國原王爲十四世斯由死

子臣夫立號小獸林王爲十五世臣夫死弟伊連立號故國壤王爲十六世伊連死子談德立爲十七世與碑合談德在位二十二年攻陷百濟石峴等十餘城又克闕彌城伐契丹虜男女五百口招諭本國沒陷民戶一萬而歸一敗百濟于水谷城再敗百濟于湨水一侵燕而平州刺史慕容歸棄城走築城國南者七築城國東禿山者六而碑所稱救新羅破倭人克東夫餘諸戰功東鑑皆失載實爲高勾麗英武之主此廣開上境之稱所由來也惟談德之攻百濟攻契丹皆在卽位五年之後免喪久矣自金富軾三國

史誤系之壬辰年權近遂有衰經伐國之貶賴有此碑可以証其誤耳碑所稱諸城名當在三國魏志東京傳三韓所屬八十國之中三穰城疑卽爰襄國阿旦城疑卽曰斯烏旦國古利城疑卽古離國牟盧城疑卽牟婁國樂彌城疑卽不彌國閏奴城疑卽順奴部芻奴城疑卽消奴部析支城疑卽月枝國其地則不易考耳百殘利殘皆卽百濟三國志避泰亾人名樂浪人曰阿殘阿與百利與濟皆聲轉鴨盧卽鴨綠也關彌城見東國通鑑碑字作閤乃關之變體或釋作閤非也

魏都督冀定十一州太尉公劉懿墓誌銘跋

此劉懿卽魏書之劉貴碑有二君諱懿字貴珍宏農  
華陰人史稱貴秀容陽曲人宏農與秀容相去甚遠  
本紀屢稱秀容人劉貴元和姓纂劉氏宏農望出漢  
高兄代王喜後則碑云宏農者其族望也祖給事父  
肆州攷之本傳父乾魏世贈前將軍肆州刺史與碑  
合而祖給事則史失載誌所敘官位多與史合爲騎  
兵時有第一酋長之號除左將軍時先厯直閣將軍  
左中郎將除涼州仍鎮西將軍之任則史從略尙書  
右僕射史作左或傳寫之譌耳史稱建明初爾朱世

隆專擅以貴爲征南將軍西南道行臺使抗莊帝行臺元顯恭則誌諱之史稱貴凡所經歷莫不肆其威酷非理殺害誌所云猛烈同于夏日嚴厲等于秋霜者亦微辭也興和元年十一月卒贈官亦與史合惟史稱諡曰忠武誌不著諡蓋誌刊于初葬時或未議諡也正月庚戌朔與通鑑目錄合銘後列七行一云夫人常山王之孫尙書僕射元生之女按魏誌常山王名遵其孫有可悉陵陪斤忠而無名生者或史譯國語而生乃華文欺俟考一云良子撫軍將軍銀青光祿大夫都督肆州諸軍事肆州刺史元孫史與誌

合而史較畧一云妻驃騎大將軍司徒元恭女案恭  
魏廣陵王羽之子也一云世子散騎常侍千牛備身  
洪徽史元孫早卒次子洪徽嗣武平末假儀同三司  
奏門下事作誌時元孫已卒故徽稱世子後爲齊河  
州刺史見齊本紀封樂縣男卒贈燕州刺史見北史  
一云妻大丞相渤海高王之第三女按史魏孝靜皇  
后獻武第二女此則孝靜后之妹也一云次子肆州  
中正徽彥一云少子徽祖無攷

魏滄州刺史王僧墓誌跋

王僧於史無徵誌云父願以眞君年中黃輿南討策  
功天府除平遠將軍卽魏書眞君十一年車駕南伐  
走宋將王玄謨事神龜年中冀土不賓民懷跋扈卽  
神龜二年瀛州民劉宣明謀反事正光年除清州高  
陽令地形志高陽縣屬青州清青北碑多不分如崔  
敬邕誌臨清作臨青是也此誌顯祖曾祖祖之名皆  
筆跡極細與全誌不同初拓者顯祖下存一直曾祖  
下存上半文字祖下似彙字之半近拓則形迹全無  
此猶初拓本也書法姿媚而勁似崔敬邕墓誌

魏崔敬邕墓志銘跋

石崔敬邕墓誌二十九行行二十九字石已佚案敬邕魏書附崔挺傳挺之從祖弟祖父名位列於誌前云祖秀才殊字敬異夫人從事中郎趙國李休女父雙護中書侍郎冠軍將軍豫州刺史安平敬侯夫人中書趙國李詵女殊與雙護不見史休卽休之別體休字紹則盛孫纘次子見北史李士謙傳詵字令孫京兆太守附李順傳高允徵士頌亦列其名誌所敘官位與史合惟爲都官時兼吏部郎史所不書誌云臨青男史作臨淄營州刺史史作管州按臨青當卽



臨清魏書地形志司州陽平郡東楚州晉寧郡皆有  
臨清縣清青本通作臨淄者史之誤營之爲管以字  
形相近傳寫而誤誌稱延昌四年徵爲征虜將軍大  
中大夫嬰疾連歲以熙平二年卒史誤以卒之歲爲  
授征虜之歲而云神龜中卒又史稱諡恭碑云諡貞  
皆當以碑爲正碑云孤息伯茂史稱子子盛襲爵奉  
朝請伯茂卽子盛字六朝時名與字史家往往隨意  
互見如源彪之稱文宗鄭頤之稱子默皆是也

北齊鄭子尙墓誌銘跋

子尙及祖萬父乾皆於史無考魏書地形志東益州有梓潼郡唯州有臨潼郡而無潼郡誌稱潼郡安陽二郡太守蓋省一字其爲梓潼臨潼則不可攷矣誌云神武皇帝委以心腹乃擢爲親信齊本紀神武建牙陽曲有款軍門願厠左右者署爲親信則親信者猶今之親軍如尉典廢爲親信都督是也又云遷長樂王府開府中兵參軍按文宣第五子紹廉初封長樂天保十年改封隴西尉粲亦襲封長樂王紹廉未爲開府儀同粲位司徒得開府置官屬子尙當是尉

粲參軍本紀天保五年詔常山王演上黨王渙平原王段韶於洛陽西南築伐惡城嚴城太平寰宇記嚴城卽穀城在河南縣則伐惡城亦當不遠諸云武平五年卒於伐惡城子尙蓋伐惡城戍主也武成本紀云河清四年始將傳政使內參乘子尙乘驛送詔書史不書姓內參乘與親信近或卽鄭子尙未可知也

北齊文宗殘墓志跋

誌僅存七十餘字蓋北齊源彪墓志也誌有云君諱

文宗缺又云祖爲西戎所逼以眾臣魏天子嘉缺又

云司徒隴西惠王父子恭司空文獻公按北齊書彪

傳云字文宗西平樂都人也父子恭魏中書監司空

文獻公與誌合彪蓋以字行故誌稱諱文宗卽齊書

本傳亦惟篇首著彪名文中遇稱彪名處皆以文宗

書之子恭魏書附其祖源賀傳賀本河西王禿髮傉

檀之子傉檀爲乞伏熾磐所滅賀自樂都來奔卒贈

侍中司徒謚惠懷有十七子子恭其一也誌云祖爲

西戎所逼以眾臣魏謂賀也祖字上所缺者必曾字  
司徒隴西惠王蓋謂懷也文宗之祖彪後入周授儀  
同大將軍入隋授莒州刺史遇疾去官開皇六年卒  
年六十六見本傳則誌刻於隋時矣

北周賀壬公墓誌跋

右侯植墓誌高廣皆一尺一寸三分二十五行行二十一  
字石在陝西沈吉田方伯所贈也題周故開府  
賀壬公之墓誌案植周書北史皆有傳誌云字永顯  
建昌人其先侯姓漢司徒霸之後史云字仁幹上谷  
人燕散騎常侍龕之八世孫高祖恕魏北地郡守子  
孫因家於北地之三水父欣泰州刺史字貫與史不  
同案漢之上谷屬幽州魏改隸東燕州在今直隸宣  
化山西大同府境魏之建昌郡屬涼州漢之北地郡  
亦屬涼州魏改隸雍州又置西北地郡屬幽州皆在

今甘肅境漢三水縣屬涼州安定郡在今甘肅平涼府境興平中割安定扶風二郡地置新平郡三水乃隸新平晉廢魏神麴中復隸涇州置新平郡上谷與建昌不相涉愚謂史稱上谷乃龕之籍至恕始遷三水魏兩北地郡皆無三水縣新平與北地毗連故由北地而家三水魏建昌郡置于何時古爲何地地形志缺以誌葬于幽州三水縣及史傳家北地之三水兩語証之當于漢三水縣境爲近魏世州郡陷復改置不常卽幽州一州自皇興至太和五易其名可見而史所失載尤多書缺有間今旁推曲証而得其故

恕爲侯植高祖其人當在道武時其時三水當隸北地郡故曰家北地之三水至太武神麋中置涇州新平郡乃改隸新平故地形志以三水隸新平至永熙以後當又割三水等縣置建昌郡後又改建昌郡隸幽州而周仍之故誌稱建昌人又曰葬于幽州三水縣但地形志皆失載耳序所謂永熙綰籍無者不錄是也史著其祖籍則曰上谷誌記其所居則曰建昌耳戮河橋之封豕摧沙苑之長蛇與傳稱從太祖破沙苑戰河橋合騁驍悍于洛陽與傳稱齊神武逼洛陽從孝武西遷合周書本紀大統二年太祖率眾聲



言還長安潛至小關縱兵擊竇泰斬之誌云平竇賊于小關者指此太祖率十二將東伐至弘農東魏高干李徽伯拒守命諸將冒雨攻之城潰斬徽伯虜其戰士八千漢弘農魏改恆農在今陝州境周虢仲封國誌云尅恆農于陝虢者指此大統十三年開府楊忠園柳仲禮長史馬岫于安陸十四年仲禮來援忠大破之斬仲禮馬岫以城降宋安陸郡屬司州今德安府隨州境周隨侯封國誌云效武績于隋陸指此蓋此三役植皆在行間傳不詳書可據此以補其缺其官右光祿大夫義州刺史驃騎大將軍開府儀同

三司司倉大夫肥城縣開國公賜姓賀弔氏皆與史合惟厯衛大將軍太子中舍人史亦失載河陽太守史作清河贈光州刺史史作平州謚曰斌史作謚曰節子定遠次定徽次定嵩次定國次定周次定貴史惟載一子名定不云定遠皆當以碑正之卒保定四年四月己丑朔與通鑑目錄合惟戊申爲二十日碑云二十一日小誤竟作競華作莘捷作撝陸作陸號作號戮作戮苑作苑長作長遐作遐證以北碑往往多同疑皆太武帝所造新字非別體也

隋吳公李氏女尉富娘墓誌跋

此周尉遲侯兜之曾孫女尉遲綱之孫女尉遲安之女也侯兜尙周太祖姊昌樂大長公主生迥及綱見周書尉遲迥傳綱自有傳安附綱傳誌稱姓尉氏省遲字祖兜省侯字綱封吳國公安綱第三子以嫡嗣襲爵吳國公故曰吳公也綱官位與史合史稱安大象中官柱國不言仕隋爲左光祿大夫左武衛大將軍可以補其缺富娘年十八未嫁而死其母以歸李氏而合葬之此冥婚之見於唐之前者

隋蘇慈墓誌銘跋

誌云君諱慈字孝慈按蘇孝慈北史及隋書均有傳  
父武周周兗州刺史據誌武周魏驃騎大將軍開府  
儀同三司充雲二州刺史平遙郡開國公贈綬銀延  
三州刺史則武周所厯官乃魏而非周隋書周字疑  
傳寫之誤誌所敘官位多與史合惟魏初起家右侍  
中士加曠野將軍周天和七年授左勳衛都上士建  
德元年授夏官府都上士治中義都上士四年授車  
騎大將軍儀同三司大都督領禁兵宣政元年授前  
侍伯中大夫改右侍伯少司衛大象元年授司衛上

大夫及卒謚安公史皆不書仁壽三年三月癸卯朔

輿通鑑目錄合

韋玄貞墓安鎮土府碣跋

此碑上有符篆六十四字計十一行行六字下正書  
十九行行八字文有云西方七炁素天元始符命告  
下西方炁極世界土府神鄉諸靈官順天皇后先考  
鄆王王妃崔滅度五仙託質太陰云云按唐書韋后  
傳中宗復位武三思譏羣臣上后號爲順天皇后贈  
父玄貞上洛郡王外戚韋溫傳帝幽廬陵玄貞流死  
欽州妻崔爲蠻首甯承所殺帝復位遣使迎玄貞喪  
討寧承斬其首祭崔柩柩至帝與后登長樂宮望而  
哭贈鄆王起陵曰榮先是此碣乃榮先陵中物文有

安鎮土府又有西方七炁云云則知東南北中亦有之共五石惟此僅存蓋道家厭勝術也周仁軌傳云睿宗夷玄貞墓民盜取寶玉略盡天寶九載復詔發掘長安尉薛榮先往視冢銘載葬日月與發冢日月正同而陵名與尉名合是玄貞墓在當時兩遭發掘而此石至今猶存不可謂非幸矣碑不著年月其刻石當在神龍景龍時也

肅府重刊淳化閣帖跋

肅府本閣帖十冊每卷未有淳化二年壬辰歲十一月六日奉聖旨摹勒上石篆字三行萬厯四十二年乙卯歲秋八月九日草莽臣溫如玉張應召奉肅藩令旨重摹上石隸書三行卷五後摹有至正十年張瑄等觀款後附肅恭王書卷九後附肅憲王書卷十後有萬厯乙卯張鳴鶴跋丙辰趙煥跋丁巳公鼐宋維登賈鴻洙戊午李起已未盛以弘徐元宗黃和趙耒李從心庚申周鏘劉世綸天啟辛酉李夏崇禎戊寅王鐸天啟辛酉肅世子識鋤跋及不題年月周如



錦張孔教高鏘劉重慶柴以觀傳振商黃衮周懋相  
湯巖熉張鍵跋細繹諸跋皆以肅府所藏太祖所賜  
爲宋拓並無指爲淳化祖刻者以余觀之未必勝于  
潘顧兩刊耳潘顧石已無存肅本自乾隆以後殘缺  
甚多跋亦不全此本完善如新跋皆齊備又附趙書  
千文當爲前明拓本勝于近拓多矣